

Mbanjnaznganz:

Ndaw Mbanjcuengh Ra Vunzcoj "Guekgouhdingh"

那岩屯：壮寨里寻找“古句町国”先民

□ Liuz Gvangjmingz

Aen gingj gyaundeidei yinxvunz ndeu.

Mbanjnaznganz Majbang Yangh Sihlinz Yen, dieg youq diegbya funghgingj gyaundeidei, mbwnraeu nganj vunz youq haenx. Gyoengq beixnuengx Bouxcuengh ndaw mbanj gwndaenj youq ndaw laeuzfaex yiengh "ganranz" gaeuqgeq, fungsug sibgvenq, ndangdaenj caemh cungj louzmaenh yiengh daegsaek cienzdoengj, gijneix mboujdan yinx le haujlai hekyouz bae ngonzyawj youzcet, vanzlij yinx le haujlai lauxhangz damqcoj caeuq bouxmu minzsuz bae daengz ndaw mbanj damqcaz mumaeq.

Mbanjnaznganz youq baihsaebaek Majbang Yangh, dwg aen Mbanjcuengh gyaundeidei depgyawj ranghfai Denhswnggyauz Suijdencan—Huzfanhbya ndeu, miz 120 ranz 576 vunz, ndaw mbanj miz 120 aen laeuzfaex "ganranz" Bouxcuengh Ciuahmingz Ciuahcingh guh haenx, lij louzce miz gij baijbouh aenmbanj "ranzranz doxlienx, honghhongh doxdoeng" ciuhgeq aeu daeuj re caeggeq dingj bing' ep haenx, dwg Guengjsae raeuz aen mbanj gaeuq Bouxcuengh louzce ndaej ceiq ndei, gvaenghgyaengz ceiq hung ndeu, baenzneix, gij ranzlaeuz "ganranz" haenx ndaej lauxhangz ndaw guek rog guek naeuz dwg "ranzcaep biuceiq-

singq Bouxcuengh Guengjsae" "aen Mbanjcuengh daih'it Guengjsae".

Ciuq vunzlaux ndaw mbanj lwnh naeuz, Mbanjnaznganz laeb mbanj gaengq miz 1000 lai bi lizsij, vunzcoj ndaw mbanj dwg gij lwglan Guekgouhdingh ciuhgeq, vunzmbanj simsoh gaenxhong, seizneix lij louzmaenh gij fungsug sibgvenq ciuhnduj Bouxcuengh, vunzvunz rox doxgiet doxbang. Daengx mbanj miz 140 vunz rox eu gij fwen diuh Dahcinghsuij lohbaek Bouxcuengh, 103 vunz rox aeu mbawfaex boqngon diuhfwen, 180 vunz rox yungh 120 aen congzaemjrok daemj gak cungj baengzdoj roxnaeuz nyibguh ndangdaenj Bouxcuengh, 285 vunz rox cawj byaekyiengh daegsaek Bouxcuengh. Youq seizneix vwnzva baihrog nyoenx hauej mbanjbya ndawde, vunzmbanj vanzlij louzmaenh gij fungsug sibgvenq daemj baengzdoj, daenj buhbaengzdoj, gangj Vahcuengh, eu fwen, hengz fungsug gaeuq, caiqlij haujlai fungsug sibgvenq cungj caeuq "Guekgouhdingh ciuhgeq" gwnz lizsij miz lienzhaeh gig youqgaenj de, gij ndangdaenj minzcuz cienzdoengj vunzmbanj ndaej naeuz dwg "yiengh daiqbiuj denjhingz ndangdaenj Bouxcuengh Guengjsae". Gij fwen

Mbanjnaznganz ndawde haemq okmingz miz 《Fwen Ndaemreih Ndaemnaz》《Fwen Siuqseuj Labnyumx》《Fwen Guhranz》《Fwen Laeuj》doenghgij neix, fapmo ndawde miz 《Dih Laebfan》《Dih Daejgeq》《Dih Hairoen》《Gingq Megdeih Lungzsaenz》daengj, dwg "swliu lizsij lix" damqmu Bouxcuengh gak dieg Guengjsae.

Mbanjnaznganz youz Baqnamz, Bomajhauh, Siujcai daengj 3 goengq bya gyoebbaenz, laeuzfaex "ganranz" couh doxing doxbaengh dwk guh youq gwnz dingjbya, najranz laengranz lij maj miz 89 go faexgeq cien bi, sang' vid raemhrwd, mbanj rag buenz doen camca, mbanj doxgot doxumj, mbanj doxdoiq daix maj, gienjgyoeb baenz aen dem aen "doufaex", doiq dem doiq "faex gvanbaz", gyoebbaenz aen youh aen gingjsaek gyaundeidei yinxvunz. Gyoengqvunz ndaw mbanj lauxnyaec mbwksai gwndaenj youq ndaw vanzging hai dou raen goengqbya heu faexcuk loeg, diemheiq youq ndaw roeg swenj va hom, yietnaiq youq ndaw rungj youz bya heu, diuzrij, laeuzfaex, ndoengfaexcuk, nazmbaeklae, faexgeq gyoebbaenz haenx, simsangj cwxcaih, angqyangz vuenyungz, hawj vunz hozhaenz.



▲ Laeuzfaex "ganranz" doxdep doxing.



▲ Ndaw ranz baij congzaemjrok.



▲ Gwnz canx ndaej dakhaeux youh ndaej yietliengz.



▲ Dahsau ndenq venj dak haexvanz.



▲ Geij naihlaux cwxcaih naengh youq bakdou gangjgoj.



▲ Aenmbanj ing bya caep guh.

